

吾即鬼也忽變為異形須臾消滅暗嘿然
心沮歲餘遂卒然則罵神稱正是可為手
又不聞舍利弗之事乎昔舍利弗在耆闍
崛山時有一鬼名優波伽叱語伽叱鬼曰
此人今日新剃鬚髮吾當往打其頭既而
舍利弗果患頭痛目連告曰此優波伽叱
鬼打汝頭也此鬼打着闍崛山能令碎如
糠糲況打人而不苦痛乎汝真大德大力
人也不然則應手粉碎矣嗚呼此果位人
也但以新剃鬚髮高為所侮況身未必正
者乎正令身正何預於神乃敢罵之戒哉

贊曰

成湯數桀 首曰慢神 天地社稷
日月星辰 國有常祀 禮典是循
祭非其鬼 淫祠勿親 敬而遠之
孔訓可遵

太上感應篇卷之二十二

太上感應篇卷之二十三

李日華傳 鄭清之贊

廉三

棄順効逆

傳曰石碣曰賤妨貴少凌長遠聞親新聞
舊小加大姪破義六逆也君義臣行父慈
子孝兄愛弟敬六順也棄順効逆所以速
禍也大抵逆順之說要無出於此也昔長
安大姓范偉積產巨萬乃冒武公縣令范
祐為祖父持祿為縣令時黃勅家不徭役
者五十餘年更西事下戶調發皆至困弊
偉獨自若及劉敞尹長安遂發其事抵罪
家籍于官周總以累舉不第遂往蕪郡拜
都吏周吉為父日處諸子之列三代名諱
一切用焉明年偶得一解其父以詩責之
總得詩大沮慚恨遂卒為人如此豈非所
謂棄順効逆者邪惜其不聞南極壽星真
君之言太極真人徐來勒嘗遇南極壽星
真君請問壽夭吉凶之事星君曰天道福
善而禍淫神明賞順而罰逆君能刻意為
善恭己順天靜將道宜動與福會如此則

我命在我不為司殺所制鬼神所執不求
壽而自壽不務生而自生苟或隳綱紀違
天地肆惡悖悔神明反仁慈虧忠孝明則
刑網理之幽則鬼神誅之及將死而言善
過盈而求悔亦不可得按如星君之言棄
順効逆是可為乎

贊曰

公無不順 私無不逆 公本理義
私出胸臆 抑情徇理 所向端直
一念有差 萬事倒植 患吉逆凶

維帝之則

背親向疎

傳曰孔子曰不愛其親而愛他人者謂之
悖德不敬其親而敬他人者謂之悖禮大
抵親疎之分不可不明悖禮悖德不可不
戒昔申積中本宣義郎起之庶子祖母乃
翰林學士楊元素之姑時元素有子嬰疾
不事事積中始生元素以中表故取以為
子既而元素連舉二子而積中亦知所出
嘿不敢言益盡孝謹讒間不入元素愛之

凡兩遇奏薦皆力辭不肯受推以官其二弟誓志以科目自奮元豐五年果登進士第後數載元素卒於餘杭積中扶護以歸既葬終喪復為弟妹選名族辦婚嫁事畢即盡以家財付二弟拂袖而出且作歸宗議一篇數千言以示親屬大抵言所生所養恩皆一也所養既粗報所生亦不可後既歸拜其父母且訪尋所生母杜氏久而得之於閭閻中杜氏垢面跣足殆不聊生子母抱持大哭感動行路粵二十年父母死既終喪復以先疇盡歸諸兄徒手而出僦屋以居或勸令略受一二積中堅不許曰楊家資產十倍於此吾猶棄如弊屣今於諸兄生計其忍割取以自資乎士論莫不偉之時許光疑為轉運論薦于朝降詔褒美賜以一官除永興等路提舉學事未幾乃卒許公復同宣和殿學士薛嗣昌中書舍人宇文黃中列言于朝再降詔官其一子噫嘻世間如積中者有幾人耶真所謂善處者也

贊曰 人之至親 莫如父母 昆弟同氣 如是如手 演而伸之 族至于九 等衰雖殊 情義當厚 捨而之他 悖德奚取 指天地以證鄙懷 傳曰天有三十二覆地有三十二載天覆地載各理一悉人居其中順吉逆凶其應如響小心宜畏高虞獲罪况敢輒以鄙懷指以為證不亦瀆乎昔王沂公之父雖不學問而酷好儒士每遇故紙必撥拾滌以香水收之嘗發願曰願我子孫以文學顯一夕夢宣聖拊其背曰汝敬吾教何其勤歟恨汝已老無可成就當遣曹參來生汝家晚年果得一子乃沂公也因以曾字名之竟以狀元及第官至中書侍郎門下平章事李景遜母鄭氏酷教諸子一日牆壞得一甕錢鄭氏焚香祝曰豈天地懲我子母孤寡特以賜乎然妾所願惟願諸子學業有成仕而受俸此錢非所願也復自捨

之其後景遜果登第官至太子少保嗚呼王君一言如此鄭氏一言如此而天地應之果如此孰謂指天地以證鄙懷而天地不謹責乎 贊曰 魯莊誓母 殊失孝慈 不仕誓墓 人誦羲之 戴履兩間 十日難欺 心迹洞然 自可無疑 皇天后土 詎聽淫辭 引神明而鑑猥事 傳曰一身有一身之神一宅有一宅之神腦神經根名泥丸眼神明上名英玄耳神空闕名幽田鼻神玉壘名靈堅齒神鈺鋒名羅千舌神通命名正倫髮神蒼英名太元重樓十二名太一肺神皓華名虛神肝神龍煙名含明膽神龍耀名威明心神丹元名守靈脾神常在名魂傳腎神玄冥名育嬰掌神存想名景寧乃至玉童君玉女君道父君道母君師父君師母君飲海君合命君三十六師子君丹田君上和中和

下和老君三元真君皆身之神也門戶之鬼名丞伯開閉之鬼名士伯供大門鬼吏名真公小門鬼吏名小真宅舍之鬼名奚子都房門鬼吏名萬倫竈君守吏名炎景廁上守吏名奴之道上之鬼名烏子丁道上守吏名尸供此一宅之神也當知在在處處主之者莫不各有其神猥褻之事其可輒引為鑑昔王少逸久繫幽獄陶弘景曰此人以對愆告靈故擬斯榻於此益知神明誠不可輒引之也

○ 贊曰

傳謂要盟 神所弗聽 秦人咒楚
其德不競 祝史矯舉 隨懼脩政
鄭不禳火 孔寧禱病 聰明正直
焉用口伎

施與後悔

傳曰明道中太平州旱蝗相繼民大乏食忽山澤間生一種烏昧草民採以食賴以不飢至道中環慶路飢五穀絕種忽蓬生蔽野結實如粟可以充腸熙寧初淮浙路

飢忽菌生被野甜軟頗美可以作羹元豐間青淄大飢忽山石間生一種石麩雜以少麩即可作餅聖曆間梓州大飢真武真君化為一叟逐日入城貨賣蒸熟菟茲所濟者衆建隆末河北路飢又復化為一商運到十五萬斛粟麥入城物到而商不復見官取極濟旁及數郡大抵荒歉者災也數也復生如是物者天地本心也真君亦如是者亦天地之心也今也粟天地之和具天地之象而畧無天地之心將何以稱為人哉惜其不知上士處世大慈平等兼濟為德一滅一生即登勝果不問周惠化諸君之事乎周惠化好施窮困辛苦不倦一日智觀真人化為乞人乞食街中試驗其事周果樂施即日度之今為西華真人

惜錢帛竟遇樂真君授以道要遂得仙去賢矣哉此皆以樂施而立登勝果者也曷嘗有一施與後悔者得道其列乎當知施與一事立功最速縱不一一證果亦必各獲其報不聞陽君諸公之事乎陽伯雍好施義漿一日遇一異人授以一升玉種子孫皆大富貴裴延年兄弟三人皆好惠施一日有一老人踵門乞漿兄弟待之盡敬老人曰觀君兄弟皆長者也積德如此豈無其福安史之亂為老人所引入一洞中由是得脫兵難其後兄弟皆至大官舉家壽皆過百矣百三本一貧者一日見一道者詣一鋪家乞一文錢鋪家睚眦不與百三嫉之力自探腰間一文授與是夕即夢道者與之云贊及覺願贊果落湯樞密既死數日夢其孫曰吾在生雖剛褊然無大過今歲歉若能為吾發廩拯濟遠勝為作佛事於吾亦有所賴其孫即日以五百石米付縣令孫君貺賑濟是夕復夢樞密含笑曰吾即生天矣此皆以樂施而各獲其

報者也施與後悔者可望此乎佛言施食一事當得五種福報一者命施所得福報世世長壽財富無量謂人之食七日必死我能施之使之復活故曰命施二者色施所得福報世世端正見者歡喜謂人之食色必憔悴我能施之使復充悅故曰色施三者力施所得福報世世多力永無減耗謂人之食必至羸弱我能施之使復強健故名力施四者安施所得福報世世安穩不逢災患謂人之食必愁身危我能施之使復安樂故名安施五者辯施所得福報世世通達言為人採謂人之食困不能語我能施之使復能語故辯施大矣哉此但施食一事所獲福報尚猶有五况施一切合施之處一切皆施者乎

贊曰

行道求福 移粟均民 施必祈報
 霸者假仁 要譽於外 矯情匪真
 一或失據 怨天尤人 五穀不熟
 穉穉足珍

假借不還

傳曰假借不還求之世間多有如此夫豈知生雖不還死後復當還乎吏人有陳蓋者從吳宗嗣借二百千錢崖不肯還宗嗣責曰我若前生負爾錢者今以此還若不爾負而爾負我者爾當作驢以還於我逾年獨坐廳事悅見陳蓋負錢來還不知其死急呼詰之則已潛入廐舍跡之不見俄頃馬生一駒因詢陳蓋在否則其日果已卒矣張陳二有一女名佛兒年十五忽暴卒半日後還曰初被二鬼捉去過又領復見二鬼以一黑被裹將二人納之陳家次將一花被裹奴且曰汝負他家一千五百錢今當還之忽有一綠衣前曰此人亦悟般若姑恕之失足遽墮池中驚悸乃寤其父明日因往又願詢訪果有陳家夜生三狗一斑二黑斑者偶墮池死急歸取錢以還其家陳不肯受於是相與將錢施於黃巖寺為作佛事以贖過咎然則假借可不還乎與其如此孰若生而還乎

贊曰

晉食森果 三施不報 兵連禍結
 失國是悖 銜鹿晴恩 誰謂虎暴
 一飯不忘 賢者之操 無負於心
 神人所勞

分外營求

傳曰人處世間或貴或富或賤或貧莫不各有定分陰注陽受皆宿業也分外營求是可得乎昔劉頌頗能文自謂魏科必當高板時期聖真君降言于終南山頌因持香請問真君曰子文雖優然賦命淡薄若安分退守可保餘年萬一過求必損汝壽頌不之信竟至無成而卒然則一解一第信有定分雖一解亦不可求而得也吳公誠官至大夫年踰七十將下致仕忽夢神曰子尚有七百人俸金在官未請公語且視券果如其數因戒子弟無得請子弟如戒不復形言未幾乃死子弟嘆曰真夢寐不足信耶是夕復夢神曰掛冠後所請半俸非七百人乎子弟駭然悔已無及然則

一壽一祿信有定分雖是合得亦不可盡而有也夏侯嘉正未第時有劉童子者善聲骨嘗謂公曰公惟得聲貴其他皆弱已俸外有百金橫入不病則死其後官至正言直史館充益王生辰使得數百千金弊方輦歸私第射之以為潤屋忽一緇自地起立久而方仆公驚遽感疾卒然則一錢一鏹信有定分雖橫入亦不可得而有也又不聞陰司有掠剩使之說乎裴璞死後為隴右三川掠剩使夢其友韋元方曰凡人一飲一啄乃至財寶皆有所籍其獲有限若過其數吾皆得而掠之章昱死後以罪配為揚州掠剩鬼夢僧人珉楚曰世間若我等輩千千萬萬不可勝紀凡市易獲息各有定數若踰其數吾皆得而掠之然則世間不如意者豈即此輩有以掠之耶

贊曰

性之所欲 有命存焉 富有不求
無間執鞭 居易以俟 行險疾顛

思不出位 身名則全 百爾君子
無由甫田

力上施設

傳曰不恤其力而驅迫過酷即太上所謂力上施設也夫豈知貪成爲罪便當死墮惡趣乎貪成者謂貪役人力以成其事按如李虛舟所書便可見也嘉祐中沈遇知杭州所經諸堰皆集堰牛以備牽挽時方大暑監官以下皆露宿堰上以伺水之出入忽聞以行第相呼者曰明日有何生活一曰明日沈幾之子過此知杭州吾輩又一番勞苦一曰沈幾早有子知杭州耶因嗚嗚悲嘆衆官審其言氣似非俗流使人跡之乃堰上數牛有墮淚者乃大嘆曰安知此牛非沈幾之親舊乎虛舟聞而大書以爲力上施設者戒然多有不知戒者昔盧秉爲鹽事提舉創開一河專用運鹽時秋雨連農事未畢秉乃日役數千丁夫於泥雨中驅迫穿鑿民大不堪東坡因爲作詩中有人如犄與鴨投泥相濺鷺之句便

可以見其驅迫過酷也嗚呼使見虛舟所記得無懼乎

贊曰

千仞之鰥 挾以資育 苟有顛墜
出之崖谷 胡爲安施 縱意苛酷
濟人之資 反爲民毒 所賴聖君
數錫五福

太上感應篇卷之二十三